

Regional News Unit AIR Aizawl
Saturday, September 12, 2026

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Chief Minister Pu Lalduhoman thlai thar phurh chhuahnan leh lo hla deuh te kal nan mono rail hman a ni dawn a ti.
- MizoTaxi App-a in register Taxi-te chu ni tun thla ni 14 atanga ni December ni 14 thleng nitin tlan phalsak an ni.
- Ni hnih awh BRICS Summit vawi 18-na chu vawiinah New Delhi ah tan a ni dawn
- BRICS Summit neih hmain nizan khan Prime Minister Narendra Modia chuan Russian President Vladimir Putin, Iranian President Masoud Pezeshkian leh UN Secretary-General António Guterres te New Delhi ah a kawm.

<><><>

CM

Chief Minister Pu Lalduhoman thlai thar phurh chhuahnan leh lo hla deuh te kal nan mono rail hman a ni dawn a ti.

Hnahthiala ZPM South Tuipui Joint Block Conference nimina a hmanpuinaah he thu hi sawiin Pu Lalduhoma chuan Chief Minister Innovation hnuaiah mono rail hi kalpui turin hma an la a ti a, Thenzawl rubber huan hnaih lamah an ti chhin phawt dawn tih sawiin, ram tha, kawng awm silo te thlen zung zung na tur a ni a ti.

Chief Minister chuan tunah hian nasa zawka Agriculture Link Road lai turin ruahmanna siam a ni a ti a, Thal chho intan turah hian tanin, Horticulture leh Agriculture Link Road atan cheng 115 ve ve dah a nih tawh bakah tunah hian cheng vbc engemawzat an pe leh dawn bawk a ti.

Chief Minister chuan ZPM sorkar in kuthnathawktute a ngaih pawimawh avangin a tir te atangin thlai chi nga lei a ni a, tunah hian thlai dang lei turin an in ruahman leh mek a ti a, Thlai engemaw zahah thlai luman siam a nih thu te, ran luman te an kalpui bawk a, kum khata thar thei thei chi hrang hrangah pawh hmalak a ni a, sangha intodelh tumin tan lak chhoh mek a ni a ti.

Chief Minister chuan Mizoram sorkar in inkal pawhna chi a ngai pawimawh a, tunah hian chhak leh thlang zawnga motor kawngpui a kal theih nan hma lak a ni a ti bawk a, airport siamna tur pawh hmun pahnih-ah ruahman a ni a, Northeast corridor siam turah NE State pariat tana din-ah chairman a nih thu te hei hi khawvel dang nena inpawhna tur ngaihtuatu a ni dawn a, Rail kawng te pawh tih belh zel a ni tur thu a sawi.

He hunah hian South Tuipui bialtu MLA Pu Jeje Lalpekhlua, Minister Pu B. Lalchhanzova, Assembly Deputy Speaker Pu Lalfamkima, HPC Vice Chairman Pu V. Malsawmtluanga te leh an party hruaitu dang te an tel a ni.



NEW HEALTH CENTRE AT ZOCHACHHUAH

Lawngtlai Bawrhsap Pu Donny Lalruatsanga chuan Corporate Social Responsibility (CSR) kaltanga IRCON International Ltd - ten Zochachhuaha 'Health Centre' an sak chu nimin khan a hawng.

Lawngtlai Bawrhsap chuan kalkhawmte chibai bukin tangkai leh hlawk taka a mamawhtuten an chhawr theih nan a lawm taka 'Health Centre' a hawn thu a sawi a. Mipuite mamawhna hriaa IRCON International Ltd - ten Health Centre an sa chu lawmawm a tih thu a sawi a. Health Centre - chu Zochachhuah leh a chhehvel khuate bakah KMMTTP Kawngpui zawhtuten an chhawr tangkai dawn tih a sawi a. Sumdawna khawihthu Company - ten khawtlanga mawhphurhna an neih an hlenchhuahna CSR chu Lawngtlai District-a company dangte pawhin uar zawka an kalpui a tul hle tiin, hemi chungchangah hian Company hrang hrang leh Bank te inbiakna a neihpui tawh thu a sawi a ni.

IRCON International Ltd Project Head Pu Sanjay AK Tripathi chuan CSR kaltlanga hmalakna tha zawk a awm zel a beisei thu a sawi bawk a ni.



MIZO TAXI APP

MizoTaxi App-a in register Taxi-te chu ni tun thla ni 14 atanga ni December ni 14 thleng nitin tlan phalsak an ni.

Aizawl Traffic SP chuan thuchhuah siamin nimina Co-ordination Committee on Traffic Management (CCTM) thukhawm thurel chuan Section 115 of MV Act, 1988-in thuneihna a pek angin mipuite mamawh puhruk nan ,Mizoram State Transport Authority (STA) ruahman leh pawmpui- MizoTaxi App-a in ziak lut Taxi-te chu tun thla ni 14 atanga December ni 14 thlengin nitin tlan phalsak an ni a ti a. Hei bakah hian MizoTaxi App-a in ziak lut te chu anmahni Taxi hnung leh hmaah STA-in MizoTaxi App sticker a pek an tar vek tur a ni an ti.

Hetihlai hian MizoTaxi App-a Taxi in ziak lut ve lo leh Lirthei dangte chu Aizawl khawpui chhunga lirthei intlanchhawk dan tura Sorkar in mipui hriattirna nikum December ni 18-a a lo chhuah tawh angin an tlan chhunzawm vek tur a ni tih an thuchhuah ah hian an tarlang bawk.



ANTI TOBACCO DAY

Mizoram State Anti-Tobacco Day vawi 13-na chu nimin khan state chhung hmun hrang hrangah hman a ni.

Aizawlah chuan DHME Auditorium-ah Health Minister Pi Lalrinpuii hoin hman a ni a, Minister chuan, zuk leh hmuam do a, fihlim thei turin chhungkua atanga bul tan a pawimawh tih a sawi a.

Nu leh pa ten mahni fate enkawl that a, midang kuta dah mai lovin mahni fate chu ngaihpaawimawh bera neih a ngai tih a sawi. Chhungkua atanga bul tan loh chuan engtikah mah ruihhlo sim a, ram siam that theih a ni lo tih sawiin, a dona kawngah mimal, sorkar, kohhran leh khawtlang tanrual vek a ngai tih a sawi bawk.

Minister chuan kohhran a rawngbawltu leh thalai hruiatu atan pawh zuk leh hmuam fihlim ni thei se tih chu a duhthusam a nih thu a sawi a, tih takzeta do a nih loh chuan sim mai theih chi a ni lo tih a sawi. Vantlang hmuna meizial zu te hrem chungchangah pawh dan leh thupek kenkawh kawngah nasa zawka tan lak a, hmasawn a ngai tih a sawi bawk.

National Tobacco Control Program State Nodal Officer Dr Zoramthangi sawi danin, zuk leh hmuam tite zirchianna Global Youth Tobacco Survey hnuhnung berah Mizorama zirlai za zela 58 ten zuk leh hmuam an ti a, an zinga zaa 42 chuan meizial an zu a ni. Zirlai zingah zuk leh hmuam ti chhin tawh an tam avangin zirna hmunah a that lohzia inzirtirna tar leh, a la ti ve loten an tih loh zel theihna tura zirtirna leh enkawlna neih a pawimawh hle tih tarlan a ni bawk.

Kum 2013 atang khan Mizoram State Anti-Tobacco Day hi hman tan a ni a, Mizoram hi India rama State Anti-Tobacco Day hmang hmasa ber a ni. State Anti-Tobacco Day hi September ni 11-a hman thin tura ruahman a nih angin kum 2013 atangin kum tin hman thin a ni a, kumin hi a kum 13-na a ni.

<><><>

LO ZAWH PUI 2026 @ SAICHAL

Tourism Minister Pu Lalnghinglova Hmar chuan Mizo nuna bet tlat lo zawh chu tunlai mil deuha tih theih a ni em, tih an enchhin hnuah zawngchhang tlak nia an hriat avangin sawrkarin hmalakna a kalpui a ti.

Nimin khan Argiculture leh Tourism department-te tangkawp huaihawtin Saichal Zaupui-ah Lo Zawh Pui hman a ni a, Pu Lalnghinglova chuan Department dang nen tangkawpa thawkho tura ruahman niin mipui ten hamthatna an hmuh theihna tura ruahman a ni a ti.

Tourism Department leh Agriculture & Farmers’ Welfare Department tangkawp buatsaih ‘Lo Zawh Pui’ Saichal Zaupui a neihah hian a huhova hlo thlawh a ni a, Zau Pui Lo Zawh Concert te buatsaih a ni a, Power & Electricity Minister Pu F. Rodinglana pawhin a hmanpui a.

Pu F. Rodinglana chuan thingtlang Lo Neih chu Mizo nuna bet tlat ani tiin kalsan lova tunlai mila hlawk zawka tharchhuah a pun theih nana her rem a pawimawh tih a sawi. Agro Tourism chawikan nan Lo Zawhpui buatsaih chu Mizoram hmun hrang hrangah hlut a hlawh chho mek tih sawiin tun aia hmasawn zawk leh khualzin hip thei tura tan lak a pawimawh thu a sawi a ni.

<><><>

SAMART SCHEME

Mizoram KVI Board Chairman Pu C.Lalremliana chuan sorkar hmalaknaa thiam thil peipunna leh leh intuaihriamna Skill Development training ah mipa aia hmeichhia an tam zawk zel chu a khawharthlak a ti.

Central Scheme SMART scheme hnuaia thla thum chhung a puanthui zir zo mi 23 te certificate hlanna leh hmanrua semna hun Lungleia nimina an hmannah he thu hi sawiin Pu Lalremliana chuan mipa ten beautician, chhang siam, puanthui te hi zir nachang an hriat a ngai tih sawiin harh thar a ngai a ni a ti.

MKVIB CEO Pu Hnamhlunchhunga kaihhruai he inkhawm hi Lunglei Municipal Council Chairman Pu Lalzuithangan a hmanpui a, Pu Hnamhlunchhunga puanthui zir chhuak te chu khawl leh pawisa an pe a, a chhunzawm leh zel a chu an kutah a awm tawh tih sawiin PMEGP Loan te Bank ah dilin Bana Kaihruai Policy hnuaiah KVI chuan a lo tanpui thei reng a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

BRICS

Ni hnih aw h BRICS Summit vawi 18-na chu vawiinah New Delhi ah tan a ni dawn.Summit-ah hian Prime Minister Narendra Modia chuan BRICS_a a thawhpui ram hruaitute Russian President Vladimir Putin, Chinese President Xi Jinping, South African President Cyril Ramaphosa, Egyptian President Abdel Fattah El-Sisi, Indonesian President Prabowo Subianto, Iran President Masoud Pezeshkian, Crown Prince of Abu Dhabi Sheikh Khaled bin Mohamed bin Zayed al Nahyan leh ramdang hruaitute a lo mikhual a. He Summit ah hian khawvel ram thanglai ram 11 an tel dawn a. An zingah hian Brazil, China, Egypt, Ethiopia, Indonesia, India, Iran, Russia, Saudi Arabia, South Africa, leh UAE an tel dawn a. Belarus, Bolivia, Cuba, Kazakhstan, Malaysia, Nigeria, Thailand, Uganda, Uzbekistan, leh Vietnam te chu BRICS thawhpui ram an nih angin an tel ve baw k ang. BRICS hi atirah BRIC tih hming pu in ram pali intelkhawm Brazil, Russia,India, leh China ten kum 2001 a an din a ni a. South Africa in 2011 ah zawm ve in BRICS tia thlak a ni a. Tun dinhmunah member ram 11 an awm tawh a. Khawvel mihring zaa 49 hi BRICS ramchhungah an cheng a. Khawvel sum dehchhuah GDP zaa 40 hi BRICS ramte thawhchhuah a ni.

<><><>

PM

BRICS Summit neih hmain nizan khan Prime Minister Narendra Modia chuan Russian President Vladimir Putin, Iranian President Masoud Pezeshkian leh UN Secretary-General António Guterres te New Delhi ah a kawm a.

President Putin nen hian India-Russia thawhdunna hrang hrang zau takin an sawidun a. Politics, sumdawnna leh eibar zawinna, ralthuam, energy, space, thiamthil hmasawinna leh mipuite inpawhtawinna chungchangte an sawi dun a. West Asia leh Black Sea chhehvela thilthlengte an sawi bawk a ni. Buaina chingfel turin inbiakna leh dawhkana indawrna neih chu a hmanraw tha ber anih thu an sawi a ni.

PM Modia hian Iran President Masoud Pezeshkian kawm bawkin Iran nena an inlaichinna leh West Asia buaina chungchang a sawipui a ni. UN Secretary Genereal Antonio Guterres nen khawvela harsatna hrang hrangte,lawnga zalen taka veivah chungchangte, hmasawinna tluantling, energy thianghlim, khawvel mamawh khawp chaw tharchhuah leh artificial intelligence chungchangte an sawidun a n.

<><><>